

Adina pli difficil da chattar voluntaris

Il generalester è fitg dependent da la collavuraziun gratuita

■ (anr/gc) Sco quai che la revista da l'Associaziun da las vischnancas svizas relata en sia nova ediziun, èn las vischnancas pli e pli dependentas da la lavur voluntaria e gratuita che vegn prestada da la populaziun. I vegn dentant constatà ch'i saja adina pli grev da chattar la gliued per tala lavur na pajada. L'Associaziun numnada ha perquai previs dad arranschar questa primavaira ina dieta per discutir strategias, co promover dapli l'engaschi da voluntaris.

Raschuns per main interess

L'engaschi voluntari e gratuit è ina pitga impurtanta dal sistem da milissa. El enritgescha era la vita politica e sociala cun pussibilitar ina purschida variada sin il champ cultural e sportiv. Ma i dat era cunfins. L'individualissem creschent, main interess vid la vita publica e la mancanza da temp reduceschan la prontezza

da s'engaschar per la publicitad. Bliers uffizis e posts en vischnancas e citads na pon uschia betg vegnir occupads pli. Era la vischinanza cun la vischnanca svanescha e l'identificaziun cun il lieu da domicil vegn pli difficila. Ed i na resta savens nagut auter che la vischnanca sto surpigliar quai che vegneva fin ussa prestà tras benevolat.

Bler succeda betg senza voluntaris

En mintga vitg e citad è la lavur da voluntaris ina part impurtanta dals servetschs publics. I dat numerus pensums che pon be vegnir ademplids cun agid da voluntaris. Quai vala per bain inqual uffizi communal. Numerusas uras vegnan unfridas en las diversas uniuns culturalas e sportivas en ils vitgs. Il medem vala era per autras organisaziuns privatas cun finamiras idealisticas. Ins quinta che na main che

ina quarta da la populaziun svizra prestia lavur voluntaria. Senza els na giess bler betg. La qualitad da viver dad ina vischnanca dependa essenzialmain da la dimensiun da la lavur organisada ed infurmativa na pajada.

Persunas che lavuran voluntariamain e gratuitamain en las vischnancas na prestan betg sulet insatge prezios. Ellas disponan numnadamain era dad ina vasta rait da relaziuns, enconuschienschas spezialas e spiert creativ. Igl è impurtant che las vischnancas restian cunscientas da la valita da quel engaschi voluntari. Decisiv èsi perquai da sa dumandar cun tge strategias che questa lavur voluntaria possia vegnir promovida e tge ch'igl è da far per che questa vegnia renconuschida adina dapli. Perquai èsi era da muntada da sensibilisar e motivar la giuventetgna per in tal engaschi sin plaun communal.

Schanzas e cunfins da la lavur voluntaria

Lavur voluntaria e gratuita vegn prestada tant dal generalester sco d'organisaziuns privatas. Ils davos onns èn vegnids instituids posts d'intermediaziun per lavur da benevolat. Uschia datti centers persuerter en citads e regiuns. Ma era en vischnancas existan lieus da coordinaziun per la lavur gratuita. Era la lavur cumina – enconuschenta da vegl ennà tar nus – vegn pussè reactivada. La citada dieta vegn a s'occupar da «Trends, schanzas e cunfins da l'engaschi voluntari en vischnancas e citads». Ins vul eruir, nua e pertge che questa lavur voluntaria va enavos, ma surtut era dilucidar pussaivladads da la promover.



En mintga vitg e citad è la lavur da voluntaris ina part impurtanta dals servetschs publics.